

«01» սեպտեմբերի 2021թ.

ք. Երևան

Հայաստանի Հանրապետության պետական եկամուտների կոմիտեի Արարատյան մաքսատուն-վարչության պետ Կարեն Բաբայանս, ուսումնասիրելով «Արարատի Գինու Գործարան» ՍՊ ընկերության (ՀՎՀՀ՝ 04106807, հասցեն՝ ՀՀ, Արարատի մ., գ. Արարատ, պետական գրանցման համար՝ 51.110.00472, տնօրեն Սեդրակ Սերյոժայի Սարգսյան) կողմից «Ներքին սպառման համար բացթողում» մաքսային ընթացակարգով թիվ 05100010/010818/0040701 ապրանքների հայտարարագրով հայտարարագրված ապրանքների մաքսային ձևակերպման փաստաթղթերը,

Պ Ա Ր Զ Ե Ց Ի

«Արարատի Գինու Գործարան» ՍՊ ընկերության կողմից թիվ 05100010/010818/0040701 ապրանքների հայտարարագրով «Ներքին սպառման համար բացթողում» մաքսային ընթացակարգով հայտարարագրվել են ԱՏԳ ԱԱ 7309 ծածկագրին դասվող ապրանքներ: Օրենքով սահմանված կարգով ԱԱՀ-ի վճարումը հետաձգվել է երեք տարի ժամկետով՝ մինչև 01.08.2021 թվականը, սակայն ընկերության կողմից ԱԱՀ-ի վճարումը սահմանված ժամկետում չի կատարվել:

ՀՀ ՊԵԿ Արարատյան մաքսատուն-վարչության ԳՀՀ բաժնի կողմից 18.08.2021 թվականին տրված տեղեկանքի համաձայն՝ «Արարատի Գինու Գործարան» ՍՊ ընկերության ԱԱՀ-ի գծով բռնագանձման ենթակա գումարը կազմում է ընդհանուր 11,650,441 ՀՀ դրամ, որից ապառք՝ 11,576,352 ՀՀ դրամ, տույժ՝ 74,089 ՀՀ դրամ:

Նշված փաստի առթիվ ՀՀ ՊԵԿ Արարատյան մաքսատուն-վարչությունում հարուցվել է վարչական վարույթ «Արարատի Գինու Գործարան» ՍՊ ընկերության կողմից վճարման ենթակա մաքսային վճարների գանձման նպատակով, ինչի առթիվ 2021 թվականի սեպտեմբերի 01-ին ժամը 10:00-ին հրավիրվել են լսումներ, որի մասին պատշաճ կարգով ընկերության տնօրենը ծանուցվել է, սակայն չի ապահովել ընկերության ներկայացուցչի մասնակցությունը հրավիրված լսմանը, ինչպես նաև գրավոր որևէ բացատրություն կամ դիրքորոշում չի ներկայացրել:

ՀՀ Սահմանադրության 60-րդ հոդվածի 8-րդ մասը սահմանում է, որ յուրաքանչյուր ոք պարտավոր է մուծել օրենքին համապատասխան սահմանված հարկեր, տուրքեր, կատարել պետական կամ համայնքային բյուջե մուտքագրվող պարտադիր այլ վճարումներ:

ՀՀ հարկային օրենսգրքի 79-րդ հոդվածի 1-ին մասի համաձայն՝ Կառավարության որոշմամբ ընտրված ավելացված արժեքի հարկ վճարող համարվող կազմակերպությունների և անհատ ձեռնարկատերերի կողմից ներդրումային ծրագրերի շրջանակներում ապրանքների ներմուծման մասով հաշվարկված ԱԱՀ-ի գումարների վճարման ժամկետը հետաձգվում է երեք տարի ժամկետով:

Ավելացված արժեքի հարկ վճարող համարվող կազմակերպությունների և անհատ ձեռնարկատերերի ընտրության կարգը սահմանում է Կառավարությունը:

ՀՀ կառավարության 08.06.2018 թվականի «Ներդրումային ծրագրերի շրջանակում «Արարատի Գինու Գործարան» սահմանափակ պատասխանատվությամբ ընկերության կողմից ապրանքների ներմուծման դեպքում

մաքսային մարմինների կողմից հաշվարկված ավելացված արժեքի հարկի գումարների վճարման ժամկետը երեք տարի ժամկետով հետաձգելու մասին» թիվ 653-Ա որոշման համաձայն՝ Հայաստանի Հանրապետության կառավարության սահմանած կարգով ընտրված «Արարատի Գինու Գործարան» սահմանափակ պատասխանատվությամբ ընկերության կողմից իրականացվող ներդրումային ծրագրի շրջանակներում 2018 թվականի հունիսի 12-ից մինչև 2018 թվականի դեկտեմբերի 31-ը ներառյալ ներմուծվող ապրանքների՝ համաձայն հավելվածի, մաքսային մարմինների կողմից հաշվարկվող ավելացված արժեքի հարկի վճարման ժամկետը գործում է ներմուծման հայտարարագրման օրվանից հաշված 3 տարի ժամկետով:

ՀՀ հարկային օրենսգրքի 79-րդ հոդվածի 3-րդ մասի համաձայն՝ նույն հոդվածի 1-ին մասին համապատասխան վճարման ժամկետը հետաձգված ԱԱՀ-ի գումարները ենթակա են վճարման պետական բյուջե մինչև հետաձգման ժամկետը լրանալու օրը ներառյալ:

Իսկ 6-րդ մասի համաձայն՝ սույն հոդվածի 3-5-րդ մասերով սահմանված ժամկետում ԱԱՀ-ի գումարները չվճարվելու դեպքում Օրենսգրքի 401-րդ հոդվածով սահմանված տույժերի հաշվարկումը և այդ գումարների նկատմամբ հսկողությունը «Բաց թողնում» ներքին սպառման համար» մաքսային ընթացակարգով Հայաստանի Հանրապետություն ներմուծվող ապրանքների մասով իրականացնում է մաքսային մարմինը, ... :

Նույն օրենսգրքի 401-րդ հոդվածի 1-ին մասի համաձայն՝ հարկի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար հարկ վճարողը կամ հարկային գործակալը վճարում է տույժ՝ 0.04 տոկոսի չափով:

Նույն հոդվածի 2-րդ մասի համաձայն՝ նույն հոդվածի 1-ին մասով սահմանված տույժը կիրառվում է ժամանակին չմուծված հարկի գումարի (այդ թվում՝ հարկային հարաբերությունները կարգավորող իրավական ակտերով սահմանված դեպքերում՝ հարկային գործակալի կողմից չվճարված), հարկերի կանխավճարային գումարների, հարկային հսկողության արդյունքներով հայտնաբերված (պակաս ցույց տրված) հարկի գումարի նկատմամբ՝ դրանց վճարման ժամկետից անցած ամբողջ ժամանակաշրջանի համար, բայց ոչ ավելի, քան 730 օրվա համար:

«Մաքսային կարգավորման մասին» ՀՀ օրենքի 114-րդ հոդվածի 1-ին մասի համաձայն՝ մաքսատուրքի, հարկերի՝ դրանց գծով տույժերի, տոկոսների վճարման պարտավորությունը սույն օրենքով սահմանված կարգով և ժամկետում չկատարելու դեպքում դրանց բռնագանձումը մաքսային մարմինների կողմից իրականացվում է օրենքով սահմանված կարգով՝ մաքսատուրք, հարկեր վճարողի միջոցների կամ այն ապրանքների արժեքի հաշվին, որոնց համար մաքսատուրքերը, հարկերը չեն վճարվել:

Հիմքում ունենալով վերոգրյալ իրավակարգավորումների ամբողջությունը, հիմք ընդունելով թիվ 05100010/010818/0040701 ապրանքների հայտարարագիրը և ՀՀ ՊԵԿ Արարատյան մաքսատուն-վարչության ԳՀՀ բաժնի կողմից տրված տեղեկանքը՝ գտնում եմ, որ «Արարատի Գինու Գործարան» ՍՊ ընկերության կողմից հետաձգված ԱԱՀ-ի գումարը սահմանված ժամկետում չվճարելու հիմքով ենթակա է գանձման:

Ելնելով վերոգրյալից և ղեկավարվելով ՀՀ Սահմանադրությամբ, ՀՀ հարկային օրենսգրքով, «Մաքսային կարգավորման մասին» ՀՀ օրենքով և «Վարչարարության հիմունքների և վարչական վարույթի մասին» ՀՀ օրենքի 7-րդ գլխի դրույթներով՝

Ո Ր Ո Շ Ե Ց Ի

1. «Արարատի Գինու Գործարան» ՍՊ ընկերությունից հոգուտ պետական բյուջեի բռնագանձել 11,650,441 ՀՀ դրամ ԱԱՀ-ի գումար, որից ԱԱՀ-ի ապառք՝ 11,576,352 ՀՀ դրամ, տույժ՝ 74,089 ՀՀ դրամ:
2. Որոշման մասին օրենքով սահմանված կարգով իրազեկել «Արարատի Գինու Գործարան» ՍՊ ընկերությանը:

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադասության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

ԱՐԱՐԱՏՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏ



ԿԱՐԵՆ

ԲԱԲԱՅԱՆ